

Lescha da linguas: La Svizra ha ina funcziun d'exempel

(cc) Il chantun Grischun è pertutgà en dus regards da la decisiun dal cussegl federal da desister da la «lescha da linguas»: D'ina vart sco chantun cun duas linguas minoritaras, da l'autra vart sco chantun pluriling. Quai ha la regenza exprimì anc ina giada en ina brev al cussegl federal. La nova lescha da linguas avess dà impuls decisivs per projects impurtants en il sector da la promoziun da la lingua: En favur da las scolas rumantschas e da la pressa rumantscha, ma er en vista al tractament equal da las trais linguas chantunalas. La regenza è dischillusa dal conclus dal cussegl federal. Ella considerescha ses proceder sco ordvart problematic, perquai che la Svizra avess già da surpigliar ina funcziun d'exempel en connex cun la realisaziun da la charta da linguas dal cussegl da l'Europa e da la convenziun da basa per proteger las minoritads naziunalas.